



5. maj 2026

FM2026/108

**Illusqaarneq pillugu ataatsimoortumik aaqqissuuseqqinnissamut, tassungalu atatillugu pisortat aningaasalersuinermut qularnaveeqqusiiarnissaanut, aammalu akitsuutsinik apparsaagallarnissanik, nuna tamakkerlugu isigalugu periusissiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aaqqissuuseqqinnissamut pilersaarut Inatsisartunut saqqummiunneqassaaq aalajangiiffigisassanngorlugulu 2027-mi upernaakkut ataatsimiinnermi (UPA27)**

(Inatsisartunut ilaasortaq Erik Jensen, Siumut)

Qujanaq.

Siumumit siullermik erseqqissassavarput, innuttaasut amerlanerusut namminnek inigisaminnik piginnittuunissamut periarfissaqarnissaat kissaatigigatsigu politikikkut anguniagaaginnarani - ulluinnarni toqqissisimaneq, akisussaassuseq aammalu ataqqinassuseq pillugit tunngaviumik naleqartitaavoq.

Ullumikkut inissianik niuerfimmi annertusiartortumik niuffateqarneq unikaallassimalluni inissisimavugut. Kisitsisit erseqqissumik takutitsipput: pisinerit ikinnerupput, suliasaqarnerlu appararluni - pingaarnepaamillu - innuttaasut inissiamik pisinissaminnik kissaatigisaqartut, kisianni periarfissaqartinneqanngitsut. Tamanna akuersaarneqarsinnaanngilaq.

Siumut isumaqarpoq inissianik niuerfik ingerlalluartoq inuiaqatigiinni aalajaatsuni tunngaviusoq. Tamanna qarmakkanut tunngaannanngilaq, ilaqutariinnulli, najugaqartariaatsimut aammalu nuna tamakkerlugu - illoqarfinni nunaqarfinnilu - siunissamut upperinninnermik tunngavoq.

Taamaattumik siunnersuut manna tikilluaquarput.

Siullermik aningaasalersuinissamut periarfissanik pitsanngorsaanissamut pisariaqartitsineq ersarippoq. Innuttaasut amerlavallaat - pingaartumik inuusuttut aammalu siullermeerlutik pisisut - ullumikkut itigartinneqartarput, akiliisinnaannginnerat pissutigalugu pinnatik, kisianni ileqqaarnissamik aammalu qulakkeerinninnissamik nalinginnaasumik piumasaqaatinik naammassinninnginnerat pissutigalugu. Piumasaqaatit taakku Kalaallit Nunaanni pissutsit eqqarsaatigineqartanngillat. Taamaattumik nunaqarfinni isorliunerusunilu inissialiarineqartartut minnerunngitsumillu inuusuttunut inissiat pitsaanerusumik aaqqissuunneqarnissaat pisariaqarpoq.

Tamatuma saniatigut bankit ulluinnarni suleriaasiat pillugu ersarissumik isornartorsiuneq saqqummiuttariaqarparput. Najugaqarfinni mikinerusunil ilaqutariit taarsigassarsinissaminnik itigartinneqartarput, bankit imminut akilersinnaassutsip appasippallaarnera naliliiffigimmassuk. Tamanna itigartitsinermut imaluunniit erniaqarnikkut pivisorsiunngitsumik qaffasissunik taarsigassarsinissamik neqeroorutinut kinguneqartarpoq. Siumumiit tamanna akuersaarneqarsinnaanngitsut isigaarput, inuiaqatigiinni nunap immikkoortuini naligiinnginnerup



annertusiarturneranut peqataasoq. Innuttaasut tamarmik - sumi najugaqaralarunik – namminneq inigisaminnik pilersitsinissamat periarfissaqarnissaat qulakkeerneqartariaqarpoq.

Taamaattumik Siumut pitsaasumik isiginnippoq pisortanit qulakkeerinninnissamat aningaasaateqarfimmik imaluunniit aningaasalersuineramik tapersiissutaasumik pilersitsinissamat. Taamatut aaqqissuussineq aningaasaateqarfiit aarlerinartorsiornerannik annikillisisinnaavoq aammalu innuttaasut inissianik niuerfimmik peqataasinnaangitsut periarfissinneqarnissaannut ammaassisinnaalluni. Tamanna aningaasaqarnikkut ineriartornermut aammalu inooqatigiinnikkut naapertuilluarnermut tunngavoq.

Aappaattut pingaaruteqarpoq erseqqissassallugu, siunertarissaarnerit aammalu suliniutit pitsaasut pioreersut suli atuutsinneqangitsut. Assersuutigalugu sanaqateqarluni illuliortarnermut aaqqissuussat atuutsinneqarnissaat amigaateqarpoq. Siumut isumaqarpoq nutaanik suliniutinik ineriartortitsinerinnaangitsaq, kisianni aaqqissuussinerit pioreersut tamakkerlugit atuutsinneqarnissaat qulakkeertariaqaripput, innuttaasut iluaqutigisinnaasaannik.

Pingajuattut pisariaqarpoq aporfinnik pisariaqartinneqangitsunik piiaanissaq. Stempel afgift aningaasatigut artukkiineruvoq, niuerfimmik artorsareersumik unitsitsisoq. Akileraarutip utaqqiisaasumik appartinneqarnissaa niuerfimmik aallartisisinnaasumik pisariaqartinneqartumik pissuseqarsinnaavoq. Siumumut pingaaruteqarpoq tamanna siunissami ingerlatsinermik aningaasaliinerusutut isigineqassasoq - sivikitsumik annaasaqaataannartut pinnani.

Sisamaattut ersarissumik paasiuminassuseq pingaaruteqarpoq. Innuttaasut amerlasuut inissianik niuerfik paasinarluartutut misigisarpaat. Taamaattumik Siumut digitalimik inissianik paasissutissiiffissamik aammalu paasissutissiinermik nukittorsaanissamik tapersorsorpoq. Ilisimasaqarneq iliuuseqarnissamat tunngaviuvoq - aammalu innuttaasut namminneq inigisaminnik piginnittuunissamat aqquaat paasiuminarnerulersissallugu akisussaaffigaarput.

Naggataatigut erseqqissassavarput ataatsimoortumik ungasissumullu isiginnittumik inissianut periusissiornissamat pisariaqartitsineq. Inissianut politikkit namminneq kisiisa ingerlanneqarsinnaangilaq. Inuussutissarsiornikkut ineriartorneq, najugaqalernermit politikkit aammalu aningaasaqarnikkut pilersaaruserneq ataatsimoortillugit eqqarsaatigineqartariaqarput. Taamaaliornikkut aatsaat nunami tamarmi piujuartitsisumik ineriartorneq qulakkeerneqarsinnaavoq.

Tamatuma saniatigut Siumut aamma sanaartornermi pitsaassutsip pingaaruteqarnera erseqqissarusuppaa. Sanaartornermi atortussat - pingaartumik qisuk - silami uninngatinneqartut, anorimut imeqarnernullu illersorneqarnissaat piumasaqaataassaaq. Atortut atorneqalinnginneranni ajoquserneqarsimappata kingusinnerusukkut ajornartorsiuterujussuarnik pilersitsinnaavoq, matumani aamma oqummik, peqqissutsimut aammalu aningaasaqarnermut kingunerluuteqartumik. Uani pinaveersaartitsineq eqqarsarluarneruvoq aammalu inuiaqatigiinnut iluaqutaasoq.

Siumut pitsaasumik isiginnippoq naalakkersuisut ataatsimoortumik nutarterinissamat pilersaarusiarnik saqqummiussinissaannik pisussaaffilerneqarnissaat, Inatsisartunut suliarineqartussatut tunngaviliisinnaasumik.



Naggataatigut oqassaagut: Periarfissanik pilersitsineq pineqarpoq. Inuusuttunut, ilaqtariinnut aammalu kinguaariinnut tulliuttunut periarfissat. Inissianik niurfik nukittunerusoq inuiaqatigiinnik nukittunerusunik pilersitsisarpoq.

Taamatut oqaaseqarluta Siumut siunnersuutip siunertaanut tapersersuisoq nalunaarutigaarput aammalu suliap ingerlateqqinneqarnissaa qilanaaraarput.

Qujanaq.